

URATA FALËNDERIMI PAS KUNGIMIT

Vargje nxitëse për falënderim:

Si të kungohesh me Dhuratat jetëdhënëse dhe mistike, himno menjëherë dhe falëndero me të madhe Perëndinë, duke thënë me zemër dhe shpirt këto:

Lavdi më ty, o Perëndi (*3 herë*).

Dhe këtë uratë:

Të falënderoj, o Zot Perëndia im, se nuk më le mua mëkatarin, po më bëre të denjë të jem pjesëtar i të Shenjtave të tua. Të falënderoj se më bëre të denjë, mua të padenjtin, të kungohem me dhuratat e tua të kulluara dhe qiellore.

Po, o Zot njeridashës, ti që për ne durove vdekje, u ngjalle dhe na fale këto Mistere të frikshme dhe jetëdhënëse për të mirën dhe shenjtërimin e shpirttrave dhe të trupave tanë, bëj që edhe për mua të jenë këto për shërim shpirti dhe trupi, për dëbim të çdo gjëje kundërshtare, për ndriçim të syve të zemrës sime, pastrim për fuqitë e mia shpirtërore, besë e paturpëruar, për dashuri pa hipokrizi, për urtësi të plotë, për ruajtje të porosive të tua, për shtim të hirit tënd hyjnor dhe për bashkim në

mbretërinë tënde; që duke u ruajtur në shenjtërimin tënd me anën e këtyre, të kujtoj për gjithnjë hirin tënd e të mos rroj më vetëm për vete, po për ty, Zotin dhe mirëbërësin tim.

Dhe kështu, kur të lë këtë jetë me shpresën e jetës së përjetshme, të arrij në prehjen e përjetshme, ku ndihet papushim zëri i atyre që kremtojnë dhe ëmbëlsia e pafund e atyre që shikojnë bukurinë e patreguar të Fytyrës sate. Se ti je dëshira e vërtetë dhe ngazëllimi i patreguar i atyre që të duan, o Krisht Perëndia ynë, dhe ty të himnon për jetë tërë krijesa. Amin.

Një uratë tjetër e Shën Vasilit

O Zot Krisht Perëndi, mbret i jetës dhe krijues i gjithësisë, të falënderoj për të gjitha të mirat që më ke dhënë dhe për kungimin me Misteret e tua të kulluara dhe jetëdhënëse.

Të lutem pra, o i mirë dhe njeridashës ruajmë nën mbulesën tënde dhe nën hijen e krahëve të tu; dhe bëmë që gjer në frymën e fundit me mendje të pastër të kungohem denjësisht me të Shenjtat e tua për ndjesë të fajeve dhe për jetë të përjetshme; se ti je buka e jetës, burim i shenjtërimit, dhënës i të mirave dhe ty ta drejtojmë lavdinë bashkë me Atin e me Shpirtin e Shenjtë, tani e përherë e në jetë të jetëve. Amin.

Urata e Metafrastit

Ti që me dashje më dhe për ushqim Trupin tënd,
i cili është zjarr dhe djeg ata që e marrin
padenjësisht,
mos më djegësh dhe mua, o Krijuesi im,
po më tepër hyr në përbërjen e pjesëve të mia
dhe në gjithë nyjet, në veshka, në zemër.
Dhe digji gjembat e fajeve të mia.
pastroma shpirtin, shenjtëroma mendjen,
forcomi nyjet dhe të gjitha kockat,
ndriçomi të pesë shqisat
dhe të gjithë trupin peshkoje me frikën tënde.
Gjithmonë mbulomë, mbromë dhe ruajmë
nga çdo punë dhe fjalë që shpirtin e dëmton,
pastromë, lamë dhe drejtomë,
bëmë të mirë, urtësomë dhe ndriçomë,
dhe tendë të denjë të Shpirtit tënd tregomë.
Jo banesë të mëkatit, po banesë të kungatës,
që të largohet nga unë si prej ndonjë zjarri
çdo gjë e keqe dhe çdo ves i lig.
Dhe si ndërmjetës po të sjell tërë shenjtoret,
të parët e ushtrive të Engjëjve pa trup,
Pararendës Shën Joanin dhe Apostujt e urtë,
dhe Mëmën e tërëkulluar dhe të gjithënderuar,
lutjet e të cilëve priti, o përdëllyes Krisht,
dhe mua shërbëtorin tënd tregomë bir të dritës,
se Ti je vetë ndriçimi,

Ti je shenjtërimi i shpirtrave tanë, ti je, o i mirë,
dhe ty, siç të ka hije, si Perëndi dhe Zot,
lavdi po të drejtojmë përditë e përgjithmonë.

Një uratë tjetër

Trupi i yt i shenjtë, o Zot Jisu Krisht, Perëndia im, le të bëhet për mua fitim i jetës së përjetshme, gjaku yt i çmuar, ndjesë fajesh; dhe kjo lutje falënderimi le të më bëhet gëzim, shëndet dhe ngazëllim. Ti bëmë të denjë që në ardhjen tënde të dytë të qëndroj nga e djathta e lavdisë sate, me ndërmjetimet e Mëmës sate të tërëkulluar dhe të gjithë Shenjtorëve të tu. Amin.

Uratë për Hyjlindësen e Tërëshenjtë

O Zonjë Hyjlindëse e Tërëshenjtë, drita e shpirtit tim të errësuar, shpresa, mbulesa, streha, ngushëllimi dhe gëzimi im, të falënderoj që më bëre të denjë mua të padenjin të bëhem pjesëtar i Trupit të pastër dhe i Gjakut të çmuar të Birit tënd. Ti që linde dritën e vërtetë ndriçomi sytë e kuptimit të zemrës; ti që linde burimin e pavdekësisë, ngjallmë mua të vdekurin nga mëkati; o Mëmë e Perëndisë, mëshiruese dhe përdëllimtare, mëshiromë dhe tregoje zemrën time të përulur dhe të thyer, bëj që të jem me mendime të përulura dhe jo robëruese.

Ti bëmë të denjë që gjer në mbarim të jetës të marr pa dënim shenjtërimin e Mistereve të kulluara, për shërim të shpirtit e të trupit. Dhe jepmë, o Zonjë, lotë pendimi dhe rrëfimi që të të lavdëroj e të të madhëroj gjithë ditët e jetës sime, se e bekuar dhe e tërëlavdëruar je në jetë. Amin.

Pastaj thuaj:

Tani përlëshoje shërbëtorin tënd, o Zot, sipas fjalës sate, me paqe, se sytë e mi panë shpëtimin tënd, të cilin ti e përgatite faqe gjithë popujve; dritë për ndriçimin e paganëve dhe për lavdi të popullit tënd Izrael.

Shenjt Perëndi, Shenjt i fuqishëm, Shenjt i pavdekshëm, mëshirona (3 herë).

Lavdi Atit e Birit edhe Shpirtit të Shenjtë,
Tani e përherë e në jetë të jetëve. Amin.

Trini e Tërëshenjtë, mëshirona; o Zot, falna mëkatet tona; o Zot i madh, ndjei paudhësitë tona; o i Shenjtë, vështro dhe shëro sëmundjet tona, për emrin tënd.

Mëshiro, o Zot (3 herë).

Lavdi Atit e birit edhe Shpirtit të Shenjtë,
Tani e përherë e në jetë të jetëve. Amin.

Ati ynë që je në qiejt, u shenjtëroftë emri yt, ardhhtë mbretëria jote, u bëftë dëshira jote si në qiell

ashtu edhe mbi dhë. Bukën tonë të përditshme jepna neve sot, dhe falna fajet tona sikurse edhe ne ua falim fajtorëve tanë; dhe mos na shtjer në ngasje, po shpëtona nga i ligu.

Pastaj thuhet tropari i shenjtit të Meshës që kryhet atë ditë

e Shën Joan Gojartit

Fjala jote si një pishtar, shkëlqeu dhe ndriti botën e tërë me dituri; thesaret e varfërisë na dhuroi, dhe lartësinë e përlësisë na tregoi. Po siç na rrite me fjalë, Atë Shën Joan Gojartë, lutju Krishtit, Fjalës Perëndi, të shpëtohen shpirtat tanë.

e Shën Vasilit

Në tërë dhenë doli fama jote, se ajo ka pritur fjalën tënde, kur përhape dogmat e perëndishme, madhështove natyrën e gjërave, riformove zakonet e njerëzve, Shën Vasil Kryepriфт, Atë Oshënar, lutju Zotit Krisht Perëndi, të shpëtohen shpirtat tanë.

shkurtorja (kondaqi) i ditës.

Lavdi Atit e birit edhe Shpirtit të Shenjtë,
Tani e përherë e në jetë të jetëve. Amin.

Mëshiro, o Zot (*12 herë*).

Më të nderuarën se Keruvimet dhe më të lavdëruarën pa krahasim se Serafimet, që pa u cenuar linde Fjalën Perëndi, me të vërtetë Hyjlindësen ty të madhërojmë.

Lavdi Atit e birit edhe Shpirtit të Shenjtë,
Tani e përherë e në jetë të jetëve. Amin.

Me uratat e Etërve tanë të shenjtë, o Zot Jisu Krisht,
mëshirona dhe shpëtona. Amin.